

**Illup sananeqarneranut akiusup minnerpaaffissaata inatsisitigut aalajangersarneqartup appartinneratigut pisortat inissiaataanni attartortittakkani ineqarnermut akiliutip appartinneqarnissaanut periarfissat misissoqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinikkut ineqarnermut akiliutip, illup sananeqarneranut akiusup, piginnittut aningaasaliissutinit iluanaarutissaasa aammalu ineqarnermut tapiissutit allanngornerisa imminnut ataqatigiinnerat paasinarsisinneqassapput kiisalu aserfallatsaaliinissamut pilersaarutit attatiinnarneqarnissaat isiginiarneqassalluni. Kiisalu illup illuutit aserfallassimasut sananeqarneranni naliusup ingerlaavartumik nalikillilerneqartarnerani pitsaaqutit ajoqutillu misissuinikkut qulaajarneqassapput. Misissuinerup inerneru Inatsisartunut kingusinnerpaamik UKA 2021-mi agguanneqassapput.
(Inatsisartunut ilaasortaq Erik Jensen, Siumut)**

Pillugu

Sanaartornermut ataatsimiititaliap

ILASSUTITUT ISUMALIUTISSIISSUTAA

Siunnersuutip aappassaanneernejarnerani tunniunneqartoq

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Justus Hansen, Demokraatit, siulittaasoq
Inatsisartunut ilaasortaq Aqqaluaq B. Egede, Inuit Ataqtigiit, siulittaasup tullia
Inatsisartunut ilaasortaq, Erik Jensen Siumut
Inatsisartunut ilaasortaq Nikkulaat Jeremiassen, Siumut
Inatsisartunut ilaasortaq Pele Broberg, Partii Naleraq

UKA2020-mi ulloq 5. november 2020 siullermeerinninnerup kingorna siunnersuut ataatsimiititaliamit misissorneqarpoq.

1. Siunnersuutip siunertaa imarisaalu

Pisortat inissiaataanni attartortittakkani ineqarnermut akiliutip appartinneqarnissaanut periarfissat pillugit misissuisoqarnissaa siunersuummi siunertarnejarpoq. Misissuinikkut ineqarnermut akiliutip, illup sananeqarneranut akiusup, piginnittut aningaasaliissutinit iluanaarutissaasa aammalu ineqarnermut tapiissutit allanngornerisa imminnut ataqatigiinnerat paasinarsisinneqassapput kiisalu aserfallatsaaliinissamut pilersaarutit attatiinnarneqarnissaat isiginiarneqassalluni.

Siunnersuummi siunertarineqarpoq pisortat inissiaataanni amerlasuuni aserfallassimasuni akit appartinneqarsinnaanerisa misissorneqarnissaa, taamaalilluni aningaasat innuttaasunut atugassaannngortinneqarsinnaaqullugit.

2. Ataatsimiititaliap siunnersuummik suliaqarnera

Siunnersuutip siullermeerlugu suliarineqarnerani siunnersuut assigiinngitsunik isummerfigineqartoq ataatsimiititaliamit maluginiarneqarpoq.

Naalakkersuisut siunnersuutip akuersissutigineqarnissaanik innersuussinerat ataatsimiititaliamit maluginiarneqarpoq.

Kalaallit Nunaanni inissiat amerlanerit inissianik niuerfimmi¹ pisortanik pigineqarput, 2010-milu pisortat inissiaataannit 60 procentii pisortanik pigineqarlutik. 2018-mi innuttaasut peqqinnerannik misissuinnermut peqataasut 42 procentii pisortat inaataanni attartortittakkani najugaqartuullutik nalunaarutigisimavaat². Naak innuttaasut amerlanersaasa namminerisamik ineqalernissaat anguniagaagaluortoq maannakkut inuttaasut amerlasuut pisortat/Namminersorlutik Oqartussat inissiaataanni attartortittakkani aserfallassimaqisuni iluarsartuuttariaqartunilu najugaqarput.

Tamatigut inissiap qanoq issusaa inissianut akiliutigisartakkanut naapertuunneq ajormat ataatsimiititaliap paasivaa. Tamatumunnga atatillugu Ataatsimiititaliaq erseqqissaatigissavaa pisortat inissiaataannut najugaqarnermut akiliutit aningaasartuutinut tamatigut sanilliunneqartussaammata.

2.1 Taaguutit killilersorneri

Ataatsimiititaliap paasinninnera malillugu, tk. siunnersuummi tunngavilersuutit, inissiat ukkataralugit misissorneqartussat tassaammata Namminersorlutik Oqartussat inissiaataat attartortittakkat.

Danskit Naalagaaffianiit inissiat tiguneqarsimasut kisimik imaluunniit Namminersorlutik Oqartussat inissiaataat attartortittakkat tamarmik misissuinnermut ilanngunneqassanersut erseqqissaatigineqartariaqaraluortoq ilanngullugu ataatsimiititaliamit oqaatigineqassaaq. Namminersorlutik Oqartussat inissiaataat tamaasa qanoq pisoqaatigisut ukiut sorliit XX sioqqullugit sananeqarsimanersut tunngavigalugit immikkoortitersinnaaneri aamma misissuinnermi ilanngunneqarsinnaapput.

2.2 Inissianit aserfallatsaaliineq

Ataatsimiititaliap paasinninnera malillugu Kalaallit Nunaanni inissiat attartortakkat attartornermi akikinnerat kisimi aalajangiisusassanngilaq. Peqatigisaanilli taamatut pingaaruteqartigaaq inissiat aserfallassimasut iluarsarneqarnissaat annertuumik iluarsagassat

¹ Akileraartarnermut Atugarissaarnermullu Ataatsimiititaliap Iusmaliutissiissutaa, "Boligsubsidier i Grønland – baggrundsrapport marts 2011", 2011, qupperneq 12

²Inuit Pisinnaatitaaffiit Institutit: Ineqarnissamut Pisinnaatitaaffik – Kalallit nunaannu killiffik 2020, 2020, qupp. 13

annertuut ilanngullugit. Naak akikitsumik najugaqarneq iluaraluartoq, ima isumaqanngilaq inissiap iluarsartariaqannginneranik. Naammaginantumik akilimmik ineqarsinnaaneq peqatigisaanillu pitsaasumik peqqinnartumilu najugaqarnissaq periarfissaasariaqarpoq.

Illuutininik piginnittup inissianut aserfallannikunut akinik appaasoqarnissaanik pinngitsoortitserusuttunut, aserfallatsaaliinissamut amerlanernik aningaasaliinissamut kajumilersitsinissaa ataatsimiititaliamittaaq aamma naatsorsuutigineqarpoq.

2.3 “Inissianut tamakkiisumik pilersaarut”-mmut siunnersuutip ilanngutsinneqarnissaa.”

Siunnersuutip siullermeerneqarnerani siunnersuut Naalakkersuisut pilersaarutaannut “Inissiat pillugit tamakkiisumik Naalakkersuisut pilersaarutaat”-nmut ilanngunneqassasoq Naalakkersuisunit saqqummiunneqarpoq.

Inissiani attartortittakkani aserfallassimasuni inuttaasut amerlasuut najugaqarnerat ataatsimiititaliamit paasineqarpoq.

Taamaammat ataatsimiititaliap inissianik akikinnerusunik innuttaasunit pingaartumik inuunerliuteqalernissamut ulorianartorsiortunit aamma pissakinnerusunit ilaqutariinnillu isertitakinnerusunit inissiat akikinnerusut amerlinissaannut suliniutit Naalakkersuisunit aallartinneqarnissaat nukingisaarutigissavaat, tamatumani qulakkeerneqassalluni inuttaasut amerlanerusut imminnut inissaminnik pilersorsinnaalernissaat, inuttaasunullu aningaasanik attartorlutik inissiamik pisinissamut periarfissaqanngitsunut inissiat attartortittakkat amerlinissaat periarfissaalissagaluarluni.

Ataatsimiititaliap siunnersuummik suliaqarnera tunngavigalugu Inissianik attartortitsisarneq pillugu Inatsisartut peqqussutaat nr. 2 12. maj 2005-meersoq aamma § 31, imm. 2-p allanngortinnissaa iluaqutaassanersoq misissuinermi aalajangerneqarsinnaalissaaq, taamaaliornikkullu inissianut aserfallannikunut ineqarnermut akit nutaat naatsorsorneqarsinnaalissallutik.

3. Siunnersuutip aningaasatigut kingunerisassai

Aalajangiiffigisassatut siunnersuutip piviusunngortinneqarnerani aningaasatigut allaffissornikkullu kingunerisassat siunnersuutip tunngavilersorneqarnerani ilanngunneqartussaane Inatsisartut suleriaasianni § 33-mi allassimavoq.

Siunnersuutip piviusunngortinnerani aningaasatigut kingunerisassai allaaserineqarsimammata ataatsimiititaliamit maluginiarneqarpoq. Taamaalilluni siunnersuuteqartup naatsorsuutigaa aningaasartuutissat AC fuldmægtigip ukioq ataaseq sulinerata 500.000 kr.-usut qaangerneqassanngitsut. Tamatumunnga ataatsimiititaliaq oqaaseqaatissaqanngilaq.

4. Ataatsimiititaliap inassuteqaataa

Ataatsimiititaliap allannguutissatut siunnersuut tulliuuttoq saqqummiuppaa:

Illup sananeqarneranut akiusup minnerpaaffissaata inatsisitigut aalajangersarneqartup appartinneratigut pisortat inissiaataanni attartortittakkani ineqarnermut akiliutip appartinneqarnissaanut periarfissat misissoqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinikkut ineqarnermut akiliutip, illup sananeqarneranut akiusup, piginnittut aningaasaliissutinit iluanaarutissaasa aammalu ineqarnermut tapiissutit allanngornerisa imminnut ataqatigiinnerat paasinarsisinneqassapput kiisalu aserfallatsaaliinissamut pilersaarutit attatiinnarneqarnissaat isiginiarneqassalluni. Kiisalu illup illuutit aserfallassimasut sananeqarneranni naliusup ingerlaavartumik nalikillilerneqartarnerani pitsaaqutit ajoqutillu misissuinikkut qulaajarneqassapput. Misissuinerup inerneru Inatsisartunut kingusinnerpaamik UKA 2021-mi agguanneqassapput.

Nalunaarusiap inissiat akiisa piaartumik apparneqarnissaannut tunngavissinissaa ataatsimiititaliamit isumaqatigiittumit neriuutigineqarpoq; tamanna 2022-p naannginnerani pinissaa kissaatigineqarpoq. Naalakkersuisut tamanna sulissutigissagaat Ataatsimiititaliamit isumaqatigiittumit **kaammattuutigineqarpoq.**


Taamatut oqaaseqarluni isumaliutissiisummilu allassimasutut paasinnilluni matumuna siunnersuut ataatsimiititaliamit aappassaanniigassanngortinneqarpoq.



Justus Hansen
Siulittaasoq




Aqqaluaq B. Egede
Siulittaasup tullia



Pele Broberg



Erik Jensen



Nikkulaat Jeremiassen